

Tunisassianik marloqiusamik atorneqartartunik nunanut allanut nioqquteqarnermik nakkutilliineq pillugu Kalaallit Nunaannut nalunaarut

Tunisassianik marloqiusamik atorneqartartunik nunanut allanut nioqquteqarnermik nakkutilliineq pillugu Kalaallit Nunaannut inatsimmi nr. 616, 8. juni 2016-imeersumi § 3, imm. 3 aamma 4, § 9 aamma § 19, imm. 9 malillugit, tulliuttut pisinnaatitaaneq malillugu aalajangersarneqarput:

Kapitali 1

Tunisassianik marloqiusamik atorneqartartunik nunanut allanut annissuineramik nakkutilliineq

§ 1. Tunisassiat marloqiusamik atorneqartartut pineqartillugit ima paasineqartassaaq, tunisassiat, ilanngullugit software aamma teknologi, inuinnarnit atugassatut soorluttaaq sakkutooqarnermik siunertanut atorneqarsinnaasut aammalu tunisassiat tamarmik, soorlu qaartartulerinermut siunertaqanngitsunut atorneqarsinnaasut aamma sutigut tamatigut atomimik sakkussianik imaluunniit atomimik qaartartunik sanaartornermik siuarsaataasut.

§ 2. Nalunaarummi matumani aatsitassaq pineqartillugu ima paasineqartassaaq, § 4 naapertorlugu, agguaqatigiissillugu akoqassutsini aalajangersimasuni, akuutissanik kemisk-iusunik aamma tigussaasumik passussinermi, aallaavittut atortussiamik sanaartuinissamut periarfissiisoq, akuutissanik akoqartoq, aatsitassaq sunaluunniit.

§ 3. Tunisassianut marloqiusamik atorneqartartunut atatillugu, kingusinnerusukkut allannguutit ilaatillugit, nunanut allanut nioqquteqarnermik, niueqatigiinnermi akunnermiliuttut ingerlataqarnermik, teknikkikkut ikiuineramik, killeqarfiit akimorlugit nassiussuinermik angalanermilluunniit aamma nuussuineramik nakkutilliinermut EU-mi aaqiineq pillugu Europa-Parlament-ip aamma Råd-ip Peqqussutaannut (EU) 2021/821, 20. maj 2021-meersumut Ilanngussaq I-imut ilaatinneqartunik, tunisassianik marloqiusamik atuutilinnik, nunanut allanut annissuinissamut akuersissuteqaqqaarnissaq piumasaqaataavoq.

§ 4. Aatsitassanik uran-imik imaluunniit thorium-imik 0,05 pct.-imik annertunerumilluunniit agguaqatigiissillugu akulinnik, nunanut allanut annissuinissamut akuersissuteqaqqaarnissaq piumasaqaataavoq.

Imm. 2. Imm. 1-i apeqqaatinnagu, aatsitassap nunanut allanut nioqqutigisassap katilluni annertussusaata, ukiup ullorsiuteqarfiusup iluani 500 kg. ataalluguluunniit annertussuserippagu, nunanut allanut annissuinissamut akuersissuteqartariaqanngilaq.

Kapitali 2

Tunisassianut marloqiusamik atorneqartartunut nunanut allanut annissuinissamut akuersissutinut atuuffiit aamma piumasaqaataasut

§ 5. Tunisassianik marloqiusamik atorneqartartunik nunanut allanut annissuinissamut akuersissut pillugu aamma niueqatigiinnermi akunnermiliuttut ingerlataqarnissamut akuersissummik qinnuteqatit, nunanut allanut nioqquteqartarnermut nakkutilliinermik oqartussaasup innersuussutaa malillugu immersugassat immikkut ittut atorlugit Inuussutissarsiornermut, Suliffeqarnermut, Niuernermit aamma Nukissiuutinut Naalakkersuisoqarfimmut nassiunneqartassapput.

Imm. 2. Imm. 1-i malillugu qinnuteqaat, tunisassiap suliarineqarnermini inaarutaasumik atuuffissaa pillugu nalunaarummik ilanngussaqaassasoq, nunanut allanut nioqquteqartarnermut nakkutilliinermik oqartussaasup piumasarisinnaavaa.

§ 6. Ataasiakkaatut imaluunniit nunarsuaq tamakkerlugu nunanut allanut annissuinissamut akuersissutitut akuersissutit atuutilersinneqartassapput. Akuersissutit ukiunik marlunnik atuuffeqartassapput.

Imm. 2. Nunanut allanut nioqquteqartarnermut nakkutilliinermik oqartussaasoq imm. 1-i malillugu tulliuttut pillugit akuersissutini;

1. atuuffiit pillugit,
2. nunanut allanut nioqquteqartartup imaluunniit niueqatigiinnermi akunnermiliuttup akuersissutinut piumasaqaataasunik eqqortitsinissamik qulakkeerinissaq siunertaralugu suliffeqarfimmi namminermit nakkutilliinermut suleriaatsinik pilersitsinissamik pisussaaffia pillugu,
3. avammut annissuinissamut allattuivimmi akuersissut pillugu paasissutissat allattornissaannut nunanut allanut nioqquteqartartup pisussaaffia pillugu
4. nunanut allanut nioqquteqartartup imaluunniit niueqatigiinnermi akunnermiliuttuusartup akuersissut naapertorlugu nunanut allanut annissuinernik nalunaarsuinissamik imaluunniit nalunaarsuuteqarnissamik pisussaaffii pillugit,
5. nunanut allanut nioqquteqartartup imaluunniit niueqatigiinnermi akunnermiliuttuusartup allakkiatut uppersaasiissutinik toqqorsimatitaqartarnissaa pillugu,
6. nunanut allanut nioqquteqartartup imaluunniit niueqatigiinnermi akunnermiliuttuusartup allakkiatut uppersaasiissutinik, nalunaarsuiffinnik imaluunniit nalunaarsuutinik, tassanga piumasarineqartillugu, nunanut allanut nioqquteqartarnermut nakkutilliinermik oqartussaasumut takutitsinissamik pisussaaffia pillugu,
7. akuersissummut piumasaqaataasunik allannortoqarpat, tunisassianik marloqiusamik atuutilinnik nunanut allanut annissuisoqalertinnagu, imaluunniit niueqatigiinnermi akunnermiliuttoqanngikkallartillugu, nunanut allanut nioqquteqartartup imaluunniit niueqatigiinnermi akunnermiliuttuusartup, nunanut allanut nioqquteqartarnermik nakkutilliinermut oqartussaasumut ingerlaannaq kalerriuteqarnissamut pisussaaffia pillugu,
8. piumasaqaatinik aalajangersaasassaaq.

§ 7. Tunisassianik marloqiusamik atuutilinnut nunanut allanut annissuinnermut allattugaq, akitsuuserivinnut tulliuuttunut tunniunneqartassaaq:

1. Akileraartarnermik Aqutsisoqarfik, Akitsuuserivik, Nuup Mittarfia, Postboks 5300, Aqisseqarajooq, 3900 Nuuk.
2. Akileraartarnermik Aqutsisoqarfik, Akitsuuserivik, Postboks 170, 3910 Kangerlussuaq.

Imm. 2. Imm. 1-i naapertorlugu, tunisassianik marloqiusamik atuutilinnik nunanut allanut annissuinnermi, nunanut allanut nioqquteqartartup imaluunniit taassuma, nunanut allanut nioqquteqartartoq sinnerlugu nunanut allanut annissuinnermik suliaqartup, tunisassiat akitsuusiisarnermik passunneqarfianni aammalu nunanut allanut annissuinissamik allattukkamik tunniussiviusumi akitsuuseriveqarfimmi, nunanut allanut annissuinnaanermut akuersissummik takutitsissaaq.

Kapitali 3

Pineqaatisiinerit

§ 8. Nalunaarummi §§ 3-miit 5-mut malillugit aalajangiinissanut atugassanik, taanna, eqqunngitsunik imaluunniit salloqittaatinik paasissutissiisoq imaluunniit suliamik aalajangiinissamut pingaarutilinnik paasissutissanik nipangiussisoq, Kalaallit Nunaannut pinerluttulerinermik inatsit malillugu allaanerusunik pillaatissiisoqarsimangippat, akiliisitsinermik pillaatissinneqassaaq. Tamanna, nalunaarummi § 6, imm. 2 malillugu aalajangigaasunut piumasaaqatitut akerliusumik iliortumut, taamatutaaq atuuppoq.

Imm. 2. Taanna, aammattaaq nalunaarummi § 7 naapertorlugu imminit piumasaaqatigineqartunik paasissutissiinnngitsoq, akiliisitsinermik pillaatissinneqassaaq. Kalaallit Nunaannut pinerluttulerinermik inatsit malillugu allaanerusunik pillaatissiisoqarsimangippat, pissutsinik taamaattunik eqqunngitsumik paasissutissiisumut, tamanna aamma atuuppoq.

Imm. 3. Taanna, nalunaarummi §§ 3 aamma 4 malillugit taamaattoqarnissamik piumasaaqateqarfiutillugu, akuersissutaateqarani tunisassianik marloqiusamik atorneqartartunik nunanut allanut annissuisoq, Kalaallit Nunaannut pinerluttulerinermik inatsit malillugu pineqaatissinneqassaaq.

Imm. 4. Kalaallit Nunaannut pinerluttulerinermik inatsimmi kapitali 5-imi maleruagassat malillugit, ingerlatseqatigiiffiit il.il. (inatsisitigut akisussaasut) pinerluttulerinermik eqqartuussummut akisussaatinneqarsinnaapput.

Kapitali 4

Atuutilersitsiffik

§ 9. Nalunaarut ulloq XX.XX 2026 atuutilersinneqassaaq.

Imm. 2. Tunisassianik marloqiusamik atorneqartartunik nunanut allanut nioqquteqartarnermik nakkutilliineq pillugu Kalaallit Nunaannut nalunaarut nr. 67, 22. januar 2018-meersoq, atorunnaarsinneqarpoq.

Erhvervsstyrelsen, ulloq XX.XX 2026

Andreas Rahlf Hauptmann

/Signe Flege